

大方廣佛華嚴經普賢行願品別行疏鈔卷第九

唐圭峯草堂寺沙門宗密隨疏鈔

△疏第五隨喜功德三。一牒名。

經復次善男子言隨喜功德者

△疏由昔不喜他善故今隨喜。為慶悅彼除嫉妬障起平等善。

鈔第五隨喜行者隨所見善而歡喜也。十住婆沙云。所有布施福。持戒修禪慧。從身口意生。去來今所有。習學三乘人。具足一乘者。無量人天福。皆隨而歡喜。別果報中。得大眷屬。翻嫉妬障故也。

△疏然餘處隨喜在勸請後謂先滌身器。次欣法雨。後攝他同已回向三處故為此次。今明隨喜是懺中別義事勢相連故先明之平等廣大。方堪聞法。

△鈔然餘至聞法者對十住婆沙料簡次第不同也。文中二初舉彼次之意。初兩句標次謂先滌下四句列。一懺悔。二勸請。三隨喜。四回向。故為此次者。結成也。後今明下明此次之意言懺中別義者。懺除嫉妬故廣大者。自他無二故。

△疏二釋相文四。一喜如來善。

經所有盡法界虛空界十方三世一切佛刹極微塵

數諸佛如來從初發心為一切智勤修福聚不惜身命經不可說不可說佛刹極微塵數劫。一一劫中捨不可說不可說佛刹極微塵數頭目手足。如是一切難行苦行圓滿種種波羅密門證入種種菩薩智地成就諸佛無上菩提。

△鈔從因至果為一切智者為智修福方是佛因。捨不可至手足者舉內財之難尚捨則身外財可知也。如心地觀經說佛於往昔行難行苦行為凡夫時。作雪山童子為求半偈棄捨全身。薩埵王子捨身救虎為六牙象王自投獵者。作圓滿福智王施

眼睛爲金色鹿王捨身求道作慈力王施五夜叉。
 作莊嚴王施妻無吝爲最上身菩薩施頭目髓腦。
 如是一切難行苦行等。廣如菩薩本行經等說也。
 又法華經云。觀三千大千世界乃至無有如芥子。
 許非菩薩捨身命處。言圓滿種種波羅密門者。六
 度十度乃至八萬四千波羅密門也。諸度尙圓。况
 檀那中豈不兼於內身乎。故知上且偏舉難者也。
 證入種種菩薩智地者。卽十地也。亦前明福此明
 智二嚴具備也。

經及般涅槃分布舍利。

鈔遺形普濟言般涅槃古譯云入滅。總有四種。如
 下所引。此卽應滅。謂眾生無感應。盡還源。大悲熏
 修分布舍利。普使羣情滅罪生福也。言分布舍利
 者。如西域記說。如來寂滅。人天悲感。盛七寶棺。千
 氎纏身。設香華。建幡蓋。末羅之眾奉舉。發引。前後
 導從。北渡連河。盛滿香油。積多香木。縱火以焚。二
 氎不燒。爲諸眾生分散舍利。唯有髮爪儼然無損。
 八國之王備四兵。至遺直性婆羅門。謂拘尸力士。
 曰。天人導師。此國寂滅。故自遠來。請分舍利。力士
 曰。如來涅槃。甚爲苦事。滅世間明導。喪眾生慈父。

如來舍利自當供養。徒疲道路終無得獲時。諸大王遜辭以求。既不相允。重謂之曰。禮請不從。兵威非遠。直性婆羅門揚言曰。念哉大慈世尊。忍修福善。彌歷曠劫。想所具聞。今欲相凌。此非宜也。今舍利在此。當均八分。各得供養。何至興兵。諸力士依其言。即時均量。欲作八分。帝釋謂諸王曰。天當有分。勿得力競。阿那婆答多龍王。文鄰龍王。暨那鉢羅龍王。復作是議言。無遺我曹。若以力者。眾非敵矣。直性婆羅門曰。勿喧爭也。宜共分之。即作三分。一諸天。二龍王。三人間。八國重分。天龍人王莫不

悲感人間天上。各將歸於本處。建塔供養。後因無憂王位。當鐵輪。使諸鬼神分之。以為八萬四千寶塔。大唐國內。除佛牙外。有十九塔。如是分布。皆為利益一切眾生。如無上依經說。若得如來身分。如芥子許。一瞻一禮。千返生於大梵天上。受諸快樂。廣如闍維經說。故云分布等也。

經所有善根我皆隨喜。

△疏二喜諸趣善。

經及彼十方一切世界。六趣四生一切種類。所有功德我皆隨喜。

鈔二明六趣四生善中言六趣者趣謂趣向求生者所趣向處也言六者數義一、地獄二、畜生三、餓鬼四、脩羅五、人六、天言地獄者以多在下故故聖教名為地獄梵云那落迦正理論云那落云人迦名為惡人多造惡墮落其中由是之故名那落迦趣即是增上苦處也言畜生者正理論云傍生以傍行故故以為名今言畜者自人畜養攝不盡故言餓鬼者多希求故又性多怯劣形體瘦悴故言阿脩羅者正云阿蘇落正理釋云素落名天是自在義無天實德名阿素落言人者心多增上慢或

522

多思慮故名為人天者威德尊高神用自在名之為天等也四生者如下自明。

△疏三喜二乘善。

經十方三世一切聲聞及辟支佛有學無學所有功德我皆隨喜。

鈔三明二乘善中言聲聞者聲謂聲教因聞聲教悟四諦理起七方便謂五停心觀別相念觀總相念觀燔頂忍世第一是為七經說資加二位道火現前得入見道斷三界四諦下八十八使分別惑盡得須陀洹果次斷三界九地俱生四惑謂貪瞋

523

疑慢。上二界除暝。三界共有十使。分九地。斷每地九品。共有八十一品。三界共斷。欲界九品。斷至五品。名二果向。第六品盡。名一來果。謂一往天上。一來人間。或反於此。斷下二品。名三果向。斷三品。盡名不還果。更不來於欲界故。次斷上二界。八地七十二品。修惑。斷至七十一品。名阿羅漢向。斷七十二品。盡阿羅漢果。此上四果。皆因聞教。故總曰聲聞。三果四向。皆名有學。阿羅漢果。名爲無學。此有三種。一聲聞聲聞。因果俱同故。二緣覺聲聞。因是緣覺。果成聲聞。三菩薩聲聞。因是菩薩。果成聲聞。

也。言及辟支佛者。此云獨覺。獨一覺故。亦名緣覺。從緣生覺故。此有二種。一麟喻。二部行。謂觀外物。因生覺解。自得道果。猶如麒麟。獨一角故。故名麟喻。出無佛世。以神通化物也。若部行者。卽因聞解。生悟解。無性。或於十二因緣。作四諦觀。四十四智。而得菩提。或因觀老死。推因審因。三世觀之。及一法住。共成七智。約十一支。作七十七智觀。而得菩提。名爲緣覺。唯一果向。名爲有學。辟支佛果。名爲無學。此有三種。一緣覺緣覺。因果俱同故。二聲聞緣覺。因是聲聞。果成緣覺。三菩薩緣覺。因是菩薩。

果成緣覺。此上二乘與佛如來同證。解脫有大功德。能與眾生作大福田。故令隨喜也。

△疏四喜菩薩善。

經一切菩薩所修無量難行苦行。志求無上正等菩提。廣大功德。我皆隨喜。

△疏謂隨喜四類。以攝諸善。佛為最勝。所以先明。餘之三類。從劣向勝。

鈔後校量勝德文中。三一會四類。次第勝劣合宜。佛為下。是華嚴宗中。詮法次第。例多如此。初發心時。便成正覺。直造最勝。然卻從十住乃至十地等。

覺即從劣漸勝也。意顯頓悟漸修之相也。二顯日益深。引他為證。有二。初引大品經。

△疏大品經中隨喜品。明大千海水。一毛破為百分。帝取海水。可知其數。隨喜之福。不可知數。故結無盡等虛空界。法華隨喜展轉。至於第五十人。尚難校量。何況最初。

鈔大品下經云。復次。憍尸迦。三千大千國土。滿中海水。取一髮破為百分。以一分髮滴取海水。可知滴數。是隨喜福。終不可數知。故結無盡下。指自當經益深也。二引法華證。即第六卷中隨喜功德品。

第十八也。經云爾時彌勒菩薩白佛言。世尊。若有聞是法華隨喜者。得幾所福。佛答云。從會中聞隨喜。至於餘處轉說。至第五十人。其第五十人聞已。隨喜功德。今當說之。若四百萬億阿僧祇世界。六趣四生充滿。其中有人求福。一一眾生與閻浮提金銀七寶。乃至象馬車乘奴婢人民宮殿樓閣等。如是布施經八十年。後以佛法而訓導之。總令得四沙門果。是大施主所得功德。寧為多不。彌勒云。若是施主。但施眾生一切樂具。功德無量。何況能令得阿羅漢果。佛答云。如上功德。不如是第五十

人間法華經一偈隨喜功德。百分不及一。乃至算數譬喻所不能知。何況最初於會中聞而隨喜者。其福復勝無量無邊。阿僧祇不可得比。彼既如此。有廣大益。今此隨喜亦復如是。

△疏此隨喜如來權實功德。故佛最勝。

鈔三彰自所喜。重明佛勝。此隨喜如來等者。即簡異大品法華隨喜法也。言權實者。諸佛功德不出權實二位攝盡也。且通途論之。佛身及佛所修因行。皆有權實。如佛三身中。法報二身是實。變化身是權。又佛所證菩提涅槃。亦通權實。法報二身若

提是實化身菩提是權。又涅槃有三種性淨。圓淨
 涅槃是實方便淨涅槃權假。此唯就佛所證果論。
 若約佛從凡至聖所起功用自利利他門中亦有
 權實。且如凡夫初悟時始自十信初心終妙覺位。
 於其中間經不可說不可說佛刹極微塵數劫施
 為種種難行苦行。自利利他等則權實俱有。何以
 謂六度十度有為萬行一一真修故則是其實。若
 為度眾生隨根誘接亦有權假也。何以不施方便
 權巧誘之。彼難回故。若約示生王宮從初發心踰
 城學道種種苦行。乃至樹下成大菩提說法利生

等。則是權也。若言分布舍利者唯是權假也。此意
 說從因至果始終相收該羅本末都來總指也。故
 經云從初發心等。斯乃佛之功德若深若淺若實
 若權。凡所施為皆難可測。唯佛與佛餘無知也。又
 况華嚴經所說真應相即分圓全收體用無礙者
 也。故宜佛為最勝也。

△疏三總結無盡。

經如是虛空界盡。眾生界盡。眾生業盡。眾生煩惱盡。
 我此隨喜無有窮盡。念念相續無有間斷。身語意業
 無有疲厭。

△疏第六請轉法輪三牒名。

經復次善男子言請轉法輪者。

△疏即是勸請除謗法障起慈善根。

鈔第六法輪行門中分三先標名中略明轉法輪

義通途要知。先明所轉法輪略以八門分別。一釋

名義。二辯體性。三種類。四轉相。五分齊。六轉處。七

轉時。八轉主。今初釋名義者於中有二。一約所轉。

二就能轉。且初言法者軌持義。通教理行果。輪者

所成義。大小乘別。且小乘二部通明五義。一速疾

義。如輪王輪有速疾轉義。今聖智起時。一刹那間

有速疾之用也。二有取捨義。如輪王輪捨東洲取

南洲等。聖智亦爾捨苦諦取滅諦等三降伏義。如

輪王輪若未伏者即能伏之。聖智若生能斷煩惱

等。四鎮已伏義。如輪王輪盡皆歸伏。輪亦常行鎮

之。今明見道雖斷盡分別煩惱。更作觀智令障轉

遠如覆障法。五上下轉義。如輪王輪有上下轉義。

今明聖智三界上下斷煩惱也。即苦法智忍苦法

智斷欲界惑苦類。智忍苦類。智斷上界惑證無為

理具此五義名為法輪。若約大乘輪有四義。一圓

滿義。具轂輻輳三故。二摧壞義。蟻蝨拒轍輪能摧

之聖道現前能摧煩惱也。三鎮遏義即相見道更
 作觀行鎮伏煩惱做法假施設也。四不定義即從
 見道入修道修道入無學。自既證已即起慈心度
 諸眾生令同所證也。二就能轉即展轉傳授義謂
 過去佛傳至現在未來佛等能所合故。名轉法輪
 也。二明體性者。大小乘通以八聖道為體。言入聖道者一
正見。二正思惟。三正語。四正業。五具轂輻輳三故
正命。六正精進。七正念。八正定等。而配法即別。小乘以正語正業正命三法為轂。小
乘以戒為先。由持即以正見正思惟正念正精進
戒故能引生善法。四法為輻。將正定一法為輳。即定能攝大乘即以
緣諸法故。

正見正思惟二法為轂。緣大乘以即將正語正業
 正命三法為輻。以有正見故即將正念正定正精
 進三法為輳。念是定學跡。以有正念故能引生定
故以爲大小乘配屬雖別。然同以八聖道為體也。
 三明種類有三。小乘四諦若約能知。亦四謂眼智
 明覺眼即總觀餘三。如次別觀過去未來現在苦
 等。又一轉中皆生六益。謂眼智明覺通生慧生。
 如婆沙云。一轉時各別發生眼智明覺俱舍疏
 中引此論釋。彼以見道十五心中法忍名眼法智
 名智類忍。名明類智名覺。如彼疏亦引婆沙。但名

義釋眼是觀見義。智是決斷義。明者顯了義。覺者
 警察義。更加通生慧生通是除障義。慧是簡擇義。
 此卽各就一說也。二三乘中三轉四諦通三機約
 初教也。三一乘準下文有十諦差別。然盡總以無
 盡法界爲一大法輪。海常無休息也。四明轉相有
 二。一爲自三轉。一印相轉。在見道。印者不錯謬義。
 謂此是苦。如實了知。此苦聖諦。乍可令日輪冷。月
 輪熱。不可轉易。此苦聖諦。令成於樂。卽如實了知。
 是苦不虛也。餘三準此。二應作轉。亦名應修轉。在
 修道。旣知已卽須修也。作法者。謂此是苦須厭。此

是集須斷。此是道須修。此是滅須證。由未徧知。應
 徧知苦聖諦。餘三例然。三已作轉。在無學道。謂此
 是苦。我已厭。此是集。我已斷。此是道。我已修。此是
 滅。我已證也。二爲他三轉者。一示相轉。卽指示四
 諦法。相令知。謂此是苦。等令人見道也。二勸修轉。
 亦名勸知轉。旣知已卽勸令修。謂此是苦。汝應知。
 等令人修道。三名引證轉。亦名作證轉。謂此是苦。
 汝已知。等令人無學道。故淨名云。三轉法輪於大
 千。其輪本來常清淨。天人得道。此爲證。三寶於是
 現世間。三乘皆同此說。但義理差別。準大品經旣

言鹿園轉法輪時。無量眾生發菩提心。無量眾生
 得初地。等無量一生菩薩一時成佛。此亦應同彼
 三轉。是通非別。不可別配。若依一乘轉。無盡稱法
 界。法輪與所被機。同一法界。無二無別。法爾常恆
 無斷。徧益五明法輪分齊。若小乘中。佛說四諦名
 為法輪。若說世語。即非法輪。若三乘中。佛一切語
 及身威儀。皆入法輪。無不益生。故若一乘中。通三
 世間。俱入法輪。一切眾生語言。亦如法輪。經云。能
 令三界所有聲聞者。皆是如來音。六轉處。小乘唯
 一娑婆百億鹿苑等處。三乘或百億或千百億或

恆沙為一化境。一乘徧通樹形。乃至華藏。及一切
 塵中。帝網重重。具足主伴。七轉時。小乘三乘。或二
 七三七。或六七。或七七。或一年等。此並是末教。隨
 機見聞耳。一乘本教。要在初時第二七日。更無異
 說。仍攝前後。各無量劫。念念無間。亦各攝彼前後
 際劫。重重無盡。八轉人。小乘主為釋迦生身。及化
 身佛。伴謂聲聞弟子。唯益小機等。三乘主。即三身
 伴。聲聞菩薩弟子。遍被三機。一乘主。即十身。伴。即
 普賢等。亦重重無盡。唯被圓機。或通一切。即五種
 所為。如前機感中已辯。

△疏聲聞自度但懺而已。菩薩愍眾故須勸請。請佛普雨。必自他霑洽。

△疏二釋相二。一舉所請境。

經所有盡法界虛空界十方三世一切佛刹極微塵中。一一各有不可說不可說佛刹極微塵數廣大佛刹。一一刹中念念有不可說不可說佛刹極微塵數一切諸佛成等正覺一切菩薩海會圍繞。

鈔所請境中經文分二。先標所徧處。後舉所請人。處中有兩重無盡言。一一各有不可說等者。此中具有二種無礙。一一多無礙。二小大無礙。所以然

者。謂以性融相故爾。二人中有果人因人諸佛即果菩薩即因言念念有不可說等者意在境寬能請無邊故其所現身應如第一門中說一念尙然况經多劫。

△疏二。正明請法。

經而我悉以身口意業種種方便殷勤勸請轉妙法輪。

鈔正明請法中。經言種種方便殷勤勸請者。如我釋迦世尊初成正覺。住多演林。獨坐入定觀察世間。思惟所證甚深難解。唯佛乃知。若為人說彼不

能達徒施無益而默然住。復念諸佛常得梵王勸
 請方轉法輪。念是事已放白毫光。遠照三千大千
 世界。時娑婆世界主螺髻梵王承佛威神。作念往
 請。即告梵眾言。世間有情善滅惡增。佛成正覺默
 然無所說。故我宜往請。即與六十八拘胝天眾往
 詣佛所作禮。旋遶住立。具以損益白佛。唯願哀愍
 為轉法輪。後以偈讚殷勤勸請。時佛默然。梵供養
 已。忽然不現。是時如來欲令世間尊重法故。甚深
 妙法得開顯。故思惟我法深妙。非分別能解。不如
 不說是故默然。梵知聖止。詣僑尸迦。勸令同請。時

梵釋天眾共至林中。禮已三遶住立。一面說偈重
 請。世尊降伏諸魔。冤其心清淨如滿月。願為眾生
 從定起。以智慧光照世間。如來猶默。時大梵王即
 從坐起。偏袒右肩。胡跪合掌。以偈重請。如來今已
 降魔。怨智慧光明照一切世間。根熟有堪度。唯願
 世尊從定起。佛告大梵王。我法深妙。窮極寂靜。若
 為人說。彼不能解。梵釋聞已。忽然不現。梵於異時
 忽念世間魔界增劇。重詣勸請。即說偈云。摩伽陀
 國多諸異道。因邪見故。種種籌量。唯願牟尼為開
 甘露最清淨法。令其得聞。佛所證法清淨離垢。至

於彼岸無增無減於三界中超然特尊。如須彌山
 顯於大海常於眾生起哀愍心而救濟之云何棄
 捨幸以法光除諸暗冥唯佛大慈不捨本願。如師
 子吼如天雷震為眾生故轉於法輪爾時世尊以
 佛眼觀見諸有情上中下根定不定聚如來爾時
 觀不定聚眾生起大悲心作如是言。我本欲為此
 等眾生轉於法輪故出現於世。又為梵王請故。即
 以偈頌告梵王言。我今為汝請當雨於甘露。一切
 諸世間天人龍神等若有清淨者聽受如是法。梵
 王聞已歡喜禮足繞無數匝忽然不現爾時地神

告空神言。佛受梵請欲轉法輪哀愍利益安樂無
 量諸眾生故。念頃轉至有頂皆知。時有四護菩提
 樹神。一名愛法。二名光明。三名樂法。四名法行。禮
 足白佛。當於何處轉於法輪。如來告彼言於波羅
 奈仙人墮處鹿野苑中。天白佛言。彼地非勝。何於
 彼轉。佛言。舉要言之。往昔九萬一千俱胝諸佛皆
 往是處轉正法輪。一切甚深微妙之法皆從中出。
 故此常為天龍守護。是故於彼轉正法輪。時佛作
 念誰應先度。即念二仙。彼又已滅。即念五俱輪合
 先得度。即入定觀察。乃見此五人在鹿野苑。如來

卽往波羅奈城。至鹿野苑。五人共議。悉達狂人。無
 有志耐。若來此處。不應興起。及佛至已。奔速來迎。
 如來見已。卽爲說法。轉大法輪。於是三轉四諦十
 二行法輪。時憍陳如最先領解。相次五人皆得道
 果。於是三寶出現世間。皆申勸請。一切諸佛。悉皆
 如是也。問。旣約圓宗。一切無非法輪。念念常轉。今
 要請者。蓋以情迷起念。滯於色聲。旣五音令人耳
 聾。卽不聞圓音。徧演。故須請也。有隨緣請。有稱性
 請。隨緣可知。稱性請者。須恆悟一切聲如空谷響。
 緣起無性。非斷非常。一一全真。無非法界。旣聞無

所聞。卽終日聞法。心觀如此。是請轉法輪。故出現
 品法輪章中云。知聲如響而請轉法輪。了於諸法
 眞實性。故於一音中。出一切音而轉法輪。畢竟無
 生故。又云。欲知如來所轉法輪。應知如是法輪所
 出生處。佛子。如來隨一切眾生心行。欲樂無量。出
 若干音聲而轉法輪。釋曰。旣隨眾生之心。卽知願
 請轉法輪。須令自心稱法。心若不稱。亦不聞故。故
 藏和尚緣起章第六請轉法輪門中云。由一切諸
 佛唯智。唯德。菩薩卽以窮法界之智。而請佛說法。
 是故一切諸佛。無不雨大法雨。然菩薩唯願唯行。

諸佛即以甚深願力而加所請。是故菩薩無不獲於大益。當知菩薩常請諸佛常說。未曾失時也。

△疏三總結無盡

經如是虛空界盡。眾生界盡。眾生業盡。眾生煩惱盡。我常勸請一切諸佛轉正法輪。無有窮盡。念念相續。無有間斷。身語意業。無有疲厭。

大方廣佛華嚴經普賢行願品別行疏鈔卷第九